

# DOUS ANOS DE *PRESTIGE*, DOUS ANOS DE NUNCA MÁIS

Rafa Villar\*



O pasado 13 de novembro varios millares de galegos e galegas volvían a saír en manifestación polas rúas de Compostela respondendo ao chamado que se facía desde "Nunca Máis", plataforma cidadá que foi quen de xerar nestes dous anos un importante movemento social fronte ao desamparo institucional a que se veu sometido o noso país durante a maré negra provocada polo *Prestige* e os seus efectos, os cales infelizmente aínda se van deixar notar por bastante tempo no noso ecosistema.

O lema escollido para esta nova mobilización era "Dous anos de *Prestige*: Seguimos a exixir solucións e xustiza", co que se quería pór de relevo, por unha banda, a imposibilidade de pasar páxina nesta catástrofe ambiental (como se teima desde o poder político) e, por outra banda, chamar a atención acerca dunha serie de aspectos que cómpre abordar para paliar de xeito máis eficaz as consecuencias de todo tipo da devandita catástrofe.

En liñas xerais, catro eran as demandas pendentes sobre as que Nunca Máis poñía énfase ao convocar a mobilización, que cómpre lembrar veu precedida dunha campaña máis ampla que incluíu mesmo unha visita ao Congreso dos Deputados. Visita que tivo como fin exporlles aos diferentes grupos alí representados a nosa análise crítica dos investimentos previstos para Galiza nos Orzamentos Xerais do Estado para 2005, así como un catálogo de propostas referidas á mellora da situación ambiental do litoral galego, da seguridade marítima ou do necesario desenvolvemento socio-económico das zonas e sectores afectados pola maré negra.

A primeira reclamación de Nunca Máis neste segundo aniversario era a existencia dunha maior seguranza no mar que preveña eficazmente a posibilidade de accidentes marítimos e evite novas catástrofes, algo que é de extrema importancia dado o alto risco para que se volva a repetir unha situación similar.

A segunda das exixencias, que xa incide nas consecuencias ambientais da

maré negra, centrábase en demandar unha rexeneración do medio mariño e do litoral que garanta a súa recuperación e conservación, cunha planificación clara e racional, así como cunha dotación económica e de medios para acadar este fin. Nese sentido, é ben lembrar, como se vén denunciando desde o movemento ecoloxista, que persiste a contaminación de diferentes zonas dos nosos espazos naturais, á parte de que

**Nunca Máis continuará co seu labor de vixilancia da situación e de presión sobre os poderes públicos, tal como concluíu en asemblea plenaria o pasado 17 de decembro**

segue a chegada de fuel de xeito episódico a diversos puntos da costa galega.

Como terceira demanda, incluíase un punto referido á importancia de dar un apoio real ao sectores produtivos que volva a dinamizar a vida económica destes sectores e máis das zonas afectadas, sendo conscientes ademais de que en vindeiros anos os efectos da maré negra do *Prestige* con toda seguridade repercutirán tamén sobre as especies con valor comercial, como xa se comeza a percibir.

Xa por último, a cuarta das reclamacións de Nunca Máis era a referida á necesidade de que se garantise un esforzo investidor e orzamentario que

contemple a excepcionalidade do noso país tras a maré negra, esforzo que non tivera reflexo nin nos Orzamentos de 2004 e tampouco o ía ter nos de 2005, onde materias como a seguranza no mar ou a rexeneración do medio mariño apenas son tidas en conta.

O éxito mobilizador da xornada do 13 de novembro, e sobre todo o estado de cousas da cuestión *Prestige*, que aínda demanda actuacións nos máis diversos planos (o ambiental, o da seguridade e salvamento marítimos, o da dinamización socioeconómica...), fai que Nunca Máis continúe co seu labor de vixilancia da situación e de presión sobre os poderes públicos, tal como concluíu a última asemblea plenaria da plataforma cidadá do día 17 de decembro. Nese liña, Nunca Máis vén de emprazar aos Gobernos central e autonómico para que lle dean unha solución, a máis eficaz e a que teña menor impacto ambiental, ás 170.000 toneladas que se calculan de residuos recollidos da maré negra e que hoxe son un novo foco contaminante que precisa tratamento urxente.

\*Rafa Villar é portavoz nacional da plataforma cidadá Nunca Máis



Hiberce SA